

編號 3 號

【今年个避暑】黃秋枝原作

又到了一年一擺个避暑。佢聽著吾姆同吾爸偷偷仔講：「校門開，比鬼門開還較得人驚！」

因爭，阿姆平常時愛上班，還愛安排佢三姊妹个避暑生活，恤著頭那就怖怖！吾爸同吾姆參詳，為著居家安全就請「年休」輪等來看顧佢兜。

初下碼，大家都當享受著避暑，毋使跣早床、毋使赴時間去學校讀書、毋使日日寫功課，毋使這毋使該個自由自在。毋過，看吾爺哀嘆變到比平常時上班還較無閒，毋輸路口該間便利商店個電子門「叮咚、叮咚」，一日二十四點鐘个無閒。

「阿姆，等一下您愛食麼个？」「天光日愛去哪奈？」「阿爸，老弟又同老妹相搶玩具吧！」雖然講，避暑佢兜在屋下个齡數當多，毋過阿爸阿姆還係試著，佢兜係佢兩儕个「甜蜜負擔」，全力安排佢兜個假期行程同避暑學習，看重幸福親子個時間，吾个爺哀付出了當大心理負擔摺體力個挑戰。

佢座大，今年正在小學畢業。

有一日，一通電話：「帶轉來避暑啦！」隔日，阿爸阿姆就

載等佢三姊妹，轉到莊下个姐婆屋下。

姐婆个屋下歇在苗栗矮山仔腳下，屋舍个四圍係平洋洋仔、闊野野个田，田鄰堵好當在該割六月禾，割禾機行過禾行，食忒了成串成串个禾串，又兜出一袋一袋个粒粒金黃，裝袋上車了後就載去糶溼穀。獨獨輪到姐公个田頭，姐公愛留兜溼穀載轉屋面前个禾埕晒，講愛自家留來做伙食，又講分日頭晒過個穀，精出來个米，煮個飯會較香、較虬、較好食！

斷真，「六月天公無阿公，六月割禾無阿婆。」姐婆無時間，蕩耙<sup>1</sup>擎等，當當在日頭下个禾埕項，從頭接二蕩去蕩轉，看起來盡生趣又辛苦。該畫面隨分佢想著：「鋤禾日當午，汗滴禾下土；誰知盤中飧<sup>2</sup>，粒粒皆辛苦。」該係眼前目珠頭看得著個真情實景同感受。

老古人言「一粒米，百粒汗。」佢想，在您享受著恁多人付出心神摺體力個同時，除忒愛感恩現下個幸福生活，乜愛儆惜各種食物摺物品，毋好耗爽浪費，並試試啊愛曉得付出自家個關心同煞猛，分身邊個人更加幸福同圓滿正著。

<sup>1</sup> 蕩耙：音 tong paˇ；農具，丁字耙。

<sup>2</sup> 飦：音 sunˊ；煮熟的飯菜。